

COMUNE DI SOLEMINIS



COMUNU DE SOLÈMINIS

PROVÌNTZIA DE SA SARDÌNNIA DE BÀSCIU (SUD SARDÌNNIA)

Bia Crèsia, 18 CAP 09040 TEL. 070/74.95.06 – C.F.80005100922
curreu eletrònicu: biblioteca.soleminis@gmail.com

REGOLAMENTU PO SA BIBRIOTECA COMUNALI

Deliberatzioni de su Consillu Comunali Nùmeru sessantacuàturu de su Milli-noixentus-norantacuàturu (C.C. n° 64 / 1994)

cun s'aciunta de sa Deliberatzioni de su Consillu Comunali Nùmeru cùndixi de su cuàturu de Aprili de su Duamilla-e-ses (C.C. n° 15 / 04.04.2006)

TÌTULU PRIMU (I) DENOMINATZIONI E TENTAS

Artìculu unu (Art. 1)

Ant strantaxau a Solèminis cun Delibera de su Consillu Comunali Nùmeru ùndixi de su dexeotu de Friaxu de su Milli-noixentus otanta (C.C. n° 11 / 18.02.1980) una bibrioteca pùbrica, chi dda tzèrriant “Bibrioteca Comunali de Solèminis”, de propiedadi de su Comune.

Artìculu duus (Art. 2)

Sa Bibrioteca Comunali tenit sa tenta de lompi a cumprimentu su printzìpiu e su spiritu de sa Bibrioteca pùbrica, donendi apricatzioni e sustàntzia a d-una màssima ètica, cussa d-unu deretu totunu a totus is òminis a s'amellorai e a cresci a sentidu e a spiritu, e de si proponni duncas comentis a una strutura a fundamentu de sa sotziedadi.

Pruschetotu sa Bibrioteca puntat a:

- a) donai a totus is tzitadinus, foras de ddus fai spendi dinai e a no ddus limitai in nisciuna manera, unu modernu servìtziu pùbricu de ligidura;
- b) donai unu servìtziu culturali de agiudu a sa Scola de s'òbrigu, promovendi is necessàrius e oportunos cuncòrdius impari cun is Istitutzionis scolàsticas cun sa tenta a fai impreai d'efetu a totus is imparadoris e is scientis sa biblioteka;
- c) costituiiri po is chi ant acabau sa scola de s'òbrigu sa possibilidadi de cresci e de ponni infatu a is noas de sa cultura insoru;
- d) donai pruschetotu a is tzitadinus sa possibilidadi de ponni sèmpiri infatu a is noas tènnicas e professionalis;
- e) acumentai is abisòngius de imparu e de discantzu de dònna arratza de tzitadinus e proponni scioberus a is àteras fainas de su tempu liberu;
- f) formai un centru abriau de spainadura de sa cultura in calisiat bisura sua, collaborendi finas cun fainas de agiudu cun is bibliotecas de is logus de acanta;
- g) circai, spainai e mantenni sa memòria stòrica de su logu.

Artìculu tres (Art. 3)

Sa Biblioteka s'incurat de su servìtziu de ligidura in sedi e de prèstidu a domu. Promovit, puru, cunferèntzias, atòbius, abètias, amòstas, auditzionis, proietzionis de films, ligidura pùbrica po pipius e bècius, circas de importu stòricu-locali; e dònna àtera atividadi chi arresurtit respondidora a su chi interessat a su pùbricu chi-ndi est su destinatàriu e de profetu a sa spainadura de sa cultura;

Artìculu cuàturu (Art. 4)

Sa Biblioteka pinnigat apari una setzioni po piciocheddus fronia de òperas fatas aposta po s'edadi de is ligidoris prus giovineddus, e una una setzioni Sardinnia cun s'arregorta de is pubricatzionis sardas e, a su prus, de sa biddu po s'amparu e s'arregorta "cunservatzioni" de sa memòria stòrica de su logu;

TÌTULU SU DE DUUS (II) FINANTZIAMENTU E AMINISTRATZIONI

Artìculu cincu (Art. 5)

A is spesas po s'atividadi de sa Biblioteka si-nci at a podi fai fronti:

- a) cun su stantziamentu de dinai comunali chi at a podi èssiri acrèsciu, de borta in borta, in arrelatu a is abisòngius de su servìtziu e a sa disponibilidadi de su bilàntziu;
- b) cun su contributu annuali de sa Regioni (Lei Regionali de su binticuàturu de Donniasanti de su Milli-e-noixentus cinquanta, nùmeru sessantacuàturu – L.R. 24/11/1950, n. 64);
- c) cun is donatzionis e cun is contributus de is àterus Entis e de privaus tzitadinus;

Artìculu ses
(Art. 6)

Sa Bibrioteca s'impènniat a froniri is localis cuncordus e bastantis po sa sedi de sa Bibrioteca, cunformaus a su spinnigamentu de is atividadis comenti ndi bessit de s'artìculu tres (art. 3);

Artìculu seti
(Art. 7)

Sa Bibrioteca, po su funtzionamentu e sa programatzioni, s'avalessit de sa "Comissioni a sa Cultura" cun poderis consultivus e est formada de:

- su Sìndigu o su delegau cosa sua (Assessori a sa Cultura) chi ndi est meri;
- su bibliotecàriu tenendi-nci is funtzionis de segretàriu;
- nùmeru tres (n. 3) nominativus eligius de su Consillu Comunali, innui unu scioberau de sa minoràntzia;
- nùmeru duus (n. 2) nominativus in rapresentàntzia de is utentis (scioberaus de su comitau de is ligidoris comenti a su chi ndi sighit a s'artìculu 8 bis).

Is incàrrigus e is funtzionis de chini pigat parti de sa comissioni funt esercitaus a tìtulu gratùitu. Sa comissioni durat in càrriga tres annus e dda torrant a formai a sa scadèntzia sua.

Artìculu otu
(Art. 8)

Sa Comissioni:

- a) stabilessit is indiritzus generalis de sa Bibrioteca;
- b) avanzat propositas e, apustis, ddas programat, agiudendi finas inderetura a is atividadis culturalis, in s'arrespetu de totus is pensadas e tenendi in cunsideru is abisòngius e is interessus de sa Comunitadi, aici de nci portai a cumprimentu is tentas comenti ndi bessit de s'artìculu duus de custu Statutu;
- c) in prus ponnit innantis a su Consillu Comunali de agiornai casumai su presenti Statutu.

Artìculu 8 bis
(Art. 8 bis)

Su comitau de is ligidoris est formau de totus is chi funt iscritus a su prètidu. Custu comitau apròliat in assemblea anca protzèdiri a scioberai is rapresentantis suos àinturu de sa Comissioni Cultura e dònna borta chi pentzat de esprimi inditus e propositas aingìriu de su servìtziu de biblioteca.

Artìculu noi
(Art. 9)

Is lìburus, is catàlogus e sa mobìlia de sa Bibrioteca funt de cunsiderai comenti a siendas imòbilis po destinatzioni. Su chi sa Bibrioteca comentisiat còmporat cun spesas, contributus e agiudus de s'Aministratzioni Regionali est sceti impreau po finalidadis pùbricas e abarrat de propiedadi de su Comune.

Artìculu dexi
(Art. 10)

Su bibliotecàriu disponnit, po is spesas no prevèdias e de apretu, d-unu economau piticu (paris a su dexi po centu de su Contributu Regionali) po anca ddi comperai a lestru is liburus chi interessint pruschetotu a is utentis, sa cancelleria spetziali, su materiali bibliogràficu e is spesixeddas po sa promotzioni culturali; su bibliotecàriu at a presentai a sa Giunta Municipali sa rindicontazioni acumpagiada a is liòngius de is faturas arralatadas.

Artìculu ùndixi (Art. 11)

Su bibliotecàriu, chi est issu etotu su diretori de sa Biblioteca, tenit in cunsènnia totu su materiali e est su responsàbili de ddu allogai e aministrai. Est responsàbili pruschetotu de tenni beni is registros de intrada, is catàlogus, e de s'andamentu de totus is servìtzius.

Ponit innantis annu po annu a sa Comissionisu su pianu de spesa, sa lista de is liburus e su programa culturali. A su bibliotecàriu, po is atividadis culturalis, ddu ant a podi agiudai is chi pigant parti de sa Comissioni, àteru personali dipendenti o voluntàriu.